

欽定剿平粵匪方略

欽定剿平粵匪方略卷四十三 癸丑年

五月二十四日

戊辰

哈芬奏言查得河南陝州靈

寶等處爲由豫入山陝兩省大路此二處若能
得人帶兵鎮守聲勢聯絡則山陝兩省可保無
虞臣訪聞甘肅提督索文陝西延綏鎮總兵金
萬全均係久歷戎行諳練韜略可否仰懇

天恩俯念河南陝州等處爲山陝兩省門戶

飭下陝甘督撫臣派令該提鎮等酌帶精兵迅速前往

陝州靈寶等處擇要堵截以杜賊匪分竄奏入

上命軍機大臣傳諭舒興阿張祥河曰本日據哈芬奏

河南陝州靈寶等處爲由豫赴山陝兩省大路此二

處如能得人帶兵鎮守則山陝可保無虞等語著舒

興阿張祥河卽派延綏鎮總兵金萬全酌帶精兵迅

速前往陝州靈寶縣等處擇要堵截以杜賊匪分竄

二十五日己巳沈兆溥林揚祖奏言臣等自十六

日後探報賊分兩股行走一向西北一向西南
查西北係由祥符赴中牟驛路尤關緊要臣等
隨精選兵勇於十七日縋城分往衝僻各要道
奮力截殺共斃賊四十餘名生擒二十二名十
八十九等日復生擒五十二名殺斃四十二名
連日研訊生擒之賊據供自揚州逃出不過千

人沿路裹脅至汴梁約萬餘人亦有稱兩萬人者但隨裹隨散現贖五六千人因懼城上大礮不敢逼近城垣分起赴朱仙鎮屯住時將軍托明阿提督善祿都統西凌阿等統帶官兵均馳抵城下托明阿善祿緣梯上城臣等謁見詢悉賊匪竄至中牟地方僅贖零星逆匪分匿村落卽分撥馬步各隊督催起程趕緊進剿撫臣覲

抵許州不日即可回省臣等惟有會同文武員
弁督率紳士兵勇倍加嚴密防守不敢稍形鬆
懈

沈兆澧林揚祖又奏言賊匪隱匿附近村莊署
祥符縣知縣何懷珍親督役勇縋城而下赴鄉
窮搜在東鄉馬頭村斬長髮賊四名生擒十四
名又在東南鄉蘇村莊及南鄉茶菴地方擒斬

多名並搜獲僞官冊二本詳記各賊年歲里居
其生擒各賊均卽審明正法署知縣何懷珍奮
勇殺賊不避危險臣等謹將該令及守城出力
員弁隨時存記候撫臣回省再行據實覈奏奏
入

上命軍機大臣傳諭陸應穀沈兆澧林揚祖曰本月十
六日以後賊分兩股經沈兆澧等分路截殺殲斃不

少並據生擒賊供自揚州逃出不過千人沿路裹脅至汴梁約萬餘人現贖五六千人是賊匪爲數不多亦係裹脅之衆若能乘此奔竄未定之時各路官兵迅速併力追剿使賊無暇喘息定可一鼓殲除若守土文武聞警先避而封疆大吏一戰兵潰之後退居遠地毫無策應任賊從容裹脅或竄山陝或渡黃河擾及近畿遷延貽誤自問當得何罪中牟偏臨黃河

爲北來要道若北竄懷衛一帶則蔓延更不可問朱
仙鎮爲該省繁庶之區人煙輻輳若賊搶掠飽颺其
勢又將復振該撫爲守土大吏若不及早剿滅稍贖
前愆不惟無以對朕又何以對中州數萬生靈耶托
明阿西凌阿等均已到汴經文岱亦自許州起程前
進該撫續調之兵現到若干著卽督率將弁探明賊
蹤與托明阿等會商分路兜剿或迎擊於前或追剿

於後或設伏旁抄使賊進無所掠退無所踞自不難聚而殲旃仍當嚴飭沿河州縣將船隻收盡嚴密巡防絕其渡黃之路並通行各屬曉諭紳民實力團練互相保衛一遇賊匪竄至卽行合力擒殺勿任遠逸上又命軍機大臣傳諭舒倫保舒興阿張祥河哈芬曰賊自揚州竄出其始不過千人沿途裹脅雖多亦聚散無常現祇贖五六千人因被轟勦竄踞朱仙鎮現

又分股竄赴中牟縣等處意圖搶掠裹脅伺隙奔突
此股賊匪本屬烏合之衆如地方各官皆如署祥符
縣知縣何懷珍督率役勇縋城而下赴鄉殺賊何至
該匪肆行無忌若如歸德等處文武一聞有警輒然
退避卽有援兵亦何能及陝西山西與河南毗連要
隘關津必須嚴密防守所有扼要之州縣各官務卽
揀選才能出衆素爲百姓愛戴之員酌量調派並曉

諭紳士商民實力團練盤緝奸細並嚴防黃河口岸
將船隻概行收藏萬不可任賊偷渡

上諭內閣曰據沈兆澧林揚祖奏稱署祥符縣知縣何
懷珍雇勇守城復親督役勇縋城赴鄉窮搜賊匪斬
擒多名該縣不避危險奮力殺賊洵不愧守土之官
何懷珍著先行賞加同知銜仍著陸應穀督同沈兆
澧等查明與守城出力之文武員弁兵勇及紳民人

等一併奏請獎勵候朕施恩其歸德等處失守各員著陸應穀等查明該員等如係畏賊退避並未守禦以致失守城池著卽一面奏聞一面以軍法從事逆匪紛竄本多裹脅烏合之衆該地方文武如果督率官兵紳民嬰城固守以待大兵何至遽爾失陷總由該員等畏死倖生先期逃避致令賊匪肆行無忌各省督撫大吏責任封疆遇有此等貽誤劣員卽當從

嚴懲辦如意存徇庇或巧爲開脫經朕查知必將該督撫等從重治罪決不寬貸

二十七日辛未舒興阿張祥河奏言臣等接奉

諭旨以陝西防兵甚少令臣等察度情形嚴密籌備查陝西距河南僅十餘站其接壤之區又當以潼關爲最重次則商州等處均屬緊要若非調派重兵擇要駐守實不足以資捍衛臣舒興阿現

已飛調前次豫派之陝甘滿漢各營官兵七千
餘名卽日就道星馳來陝分撥駐守一面檄調
陝西提臣桂明及陝安鎮總兵郝光甲兼程來
陝以備分別統帶仍選派妥幹員弁勤加偵探
一俟現調防兵到陝分布周妥臣舒興阿卽當
體察情形前往緊要地方調度以期防剿兼資
並爲豫省聲援奏入

上命軍機大臣傳諭舒倫保舒興阿張祥河曰現在逆賊自開封敗後退至朱仙鎮中牟縣等處難保不窺伺陝西該督已豫派官兵調提鎮大員統帶卽著飛飭趕緊前進扼要設防該督仍須於陝豫交界扼要地方駐紮調度如河北衛懷一帶有警亦卽出關攔擊仍隨時知照山西巡撫一體嚴防億賊匪竄近山西交界並著不分畛域協力兜拏其本省應防要隘

及黃河上游口岸卽會同舒倫保張祥河飭令帶兵員弁及地方官認真嚴查不可稍有疏失

同日周天爵突經奏言五月十七日臣周天爵由碭山折回徐州十九日臣突經亦遵

旨馳到會勘臣等公同相度機宜於南岸十八里屯減水牯與北岸蘇家山頭斜對紮營又豫備架礮大船三十隻草船一百隻分貼兩岸灣泊埋伏

一遇賊船東駛卽督飭水陸三路兵勇迎頭截擊惟徐州驛站南接江甯浦口現在沿江賊船上竄絡繹不絕如再登岸續來更難抵禦臣等再四籌畫惟十八里屯牐下通洪澤湖宿州迤北之符離雖河一片汪洋僅有山路一道可以通以千兵守之則南來之賊可以截擊臣等當飭河員卽將此牐啟放則南路庶保無虞至符離

地南二十里之宿州係赴汴梁驛站亦應重防
但此時布置自當以徐州爲要臣奕經所帶之
兵四百餘名應請留於徐州扼要會截尙可得
力奏入

上命軍機大臣傳諭周天爵奕經曰徐州重地自宜扼
要設防經該侍郎等會勘徐州上游十八里屯減水
牆與北岸蘇家山頭斜對可以紮營並豫備架礮大

船三十隻草船一百隻分貼兩岸埋伏復啟放牐水
以截南竄之賊宿州亦經酌量布置著卽妥速辦理
一遇南來賊匪卽督飭水陸兵勇截擊毋令竄逸如
擾豫之賊沿河下竄亦著就近截剿奕經所帶之兵
四百餘名准其留於徐州會同周天爵體察情形相
機防剿並嚴防土匪勾結儻有疏虞朕惟周天爵奕
經是問

二十八日壬申陸應穀奏言臣先於十八日咨會

經文岱帶兵一千六百餘名由朱仙鎮進剿二

十日南陽鎮臣柏山帶領弁兵四百餘名並所

調襄城等營官兵先後趕到臣於二十一日會

同柏山統帶前進旋據探報逆賊已由中牟鄭

州竄至汜水該處文武督同紳民先將虎牢關

老犍坡要路挑斷不能飛越現奔汜水山內村

莊搶掠臣查該逆西竄無路勢必折回恐由密
縣山徑竄出必須分路進兵堵截托明阿善祿
業經自省起程臣卽函令由中牟鄭州進剿一
面卽將襄城等營弁兵均交柏山帶領調回經
文岱會同柏山由新鄭趕赴密縣堵截惟密縣
西路係與登封接壤可以繞至洛陽該處並無
重兵深爲可慮蒙

恩調派陝甘督臣舒興阿帶兵來豫救援相應籲懇

飭催迅速前進得保洛陽卽可以衛山陝臣隨身所帶

兵勇僅有三百餘名而省城擒獲賊匪供有裏
得人多再來圍攻之語不可不防現在先赴省
垣料理守禦事宜仍俟催取北鎮官兵一千名
並甯夏馬隊到日察看省城安靜臣卽統帶前
進策應會勦斷不敢稍圖安逸奏入

上命軍機大臣傳諭托明阿西凌阿陸應穀善祿曰逆
匪紛撲汴城雖被擊敗而夥黨分竄沿途襲脅若不
趕緊追剿致令肆行搶掠更恐滋蔓難圖現在托明
阿善祿西凌阿等先後督兵抵汴疊經嚴諭併力剿
賊何以未據續報與賊接仗情形陸應穀係封疆大
吏若不及早將逆匪撲滅但株守省城以剿匪委之
客兵儻有疏虞豈能置該撫於不問陸應穀著仍遵

前旨督兵出省乘該匪喘息未定會同托明阿善祿
西凌阿經文岱柏山等迅速進剿總須探明賊蹤專
力攻擊自可一鼓殲滅若徒分兵於遠處堵截賊來
不擊賊去不追又蹈從前覆轍統兵大員及該撫豈
能當此重罪耶省垣防守仍責成沈兆霖林揚祖督
同所屬勸諭紳民嚴密巡查不可稍有疏懈其近賊
地方前已疊降諭旨令舒興阿派員出關援應該撫

仍宜隨時知照山陝兩省一體防範勿稍疏虞

同日張芾奏言臬司江忠源於五月十六日自九江陸路來省探聞賊船已入湖口乘風直上吳城水面亦寬江忠源兵力又寡卽能保護該處地方斷不能阻賊來省之路權其輕重緩急仍當在省協同守禦現在臣陳孚恩率同江西臬司惲光宸前任山東臬司徐思莊等帶領官

紳三局練勇一千八百餘名並浙江處州營遊
擊常海帶兵數百名於城北得勝門外分立營
壘互爲犄角以備迎擊臣與江忠源及地方文
武官紳督帶兵勇丁壯登陴固守江忠源仍隨
時出城策應所謂九江南贛兩鎮兵陸續可到
惟江西兵力本弱未經臨陣所恃者惟江忠源
一旅殊覺單薄應請

飭下向榮及湖廣督撫迅卽撥兵救援不特保護江西
兼可將此股分竄之賊先行撲滅實於東南大
局有益

同日江忠源奏言臣疊奉江西撫臣等札飭臣
進省堵禦臣思江省爲糧臺根本重地較之九
江殘破之區輕重懸殊卽日帶勇兼程進省與
撫臣等妥籌守禦務期計出萬全以紓

聖主南顧之憂惟臣所帶楚勇及江省原調兵勇不滿
五千戰守尙形單薄相應請

旨飭下向榮於大營中迅撥精兵二三千名交得力鎮
將如和春秦定三等管帶迅速由陸路趕緊前
來以資應援均奏入

上命軍機大臣傳諭張芾江忠源曰此項船隻自停泊
彭澤已將旬日該臬司駐紮九江府城相距咫尺自

必確有見聞此次奏報情形僅有賊船已入湖口一語究竟賊船於何時入湖沿江一帶有無失事九江是否安堵船上人等曾否抗拒官兵搶掠地方該臬司及張芾摺內均未詳細聲敘朕心實深懸繫如果此項船隻實係逆匪分股自應亟籌剿滅但恐其中多係難民下游旣已免死遣散而該省復加以截擊豈不激成事端又勞兵力且卽以真賊而論連艘千

計人數衆多亦豈株守南昌所能了事該撫等務當偵探明確統籌全局毋誤事機張亮基前奏辦理情形甚合機宜該撫仍當趕緊會商分別應勦及應行遣散之處妥籌速辦一面會同陳孚恩督同江忠源嚴密布置固不可自相擾亂徒事驚惶亦不可恃爲無虞稍存大意向榮軍營官兵能否抽撥尙難豫定本日已諭令酌量調派卽著該撫飛咨商辦

上又命軍機大臣傳諭向榮許乃釗曰此股上竄賊船意在直撲南昌牽掣江南大軍著該大臣確探賊情酌量撥兵援應如實係遣散匪黨應如何設法彈壓解散亦卽飛咨張亮基與張芾妥籌辦理

二十九日癸酉向榮許乃釗奏言臣等接奉

諭旨飭令瞿騰龍酌帶兵勇馳往河南山東一帶攻剿伏思該逆以旁竄分我之力以負固老我之師

以久踞糜我之餉恐大兵稍一挪移則東南半壁更難支持茲謹遵

旨飭令瞿騰龍統帶陝甘精兵一千八百名湖南精兵二百名於本月二十二日由紫金山大營分起啟行取道丹徒渡江賊蹤竄擾隨時變遷已飭令瞿騰龍於渡黃時與河臣楊以增山東撫臣李德熟商確探賊蹤所向以何處爲急卽往馳

救臣向榮克復無方未能遏賊北竄上煩

聖慮應請

旨交部從重治罪以爲討賊不力者戒至金陵省城自
本月初八初十日兩次破賊營之後該逆益加
嚴備乘我兵不能在彼駐紮復將已毀營盤連
夜修整依城踞守臣逐日飭令出隊誘敵一面
飭翼長等躡覓隱僻處所暗挖地道密爲布置

惟自本月十四日至今陰雨未晴不勝焦急惟
有激勵將士先行政克金陵卽當相機分兵北
上總期殄此羣醜庶可稍紓

宸念用贖臣愆奏入

上諭曰汝所請治罪又係汝之取巧故智勿謂朕不能
看出續有廷寄內硃諭皆係誅心之論不知汝知警
否總之若能迅克金陵則汝功最大若仍喫緊時巧

爲嘗試則汝之罪難寬懷之

同日訥爾經額奏言逆匪被官兵擊退由鄭州
一帶奔竄臣思賊情詭譎一經挫折勢必乘虛
分擾必須將其北竄之路處處堵截查黃河北
岸之彰德衛輝二府均距鄭州甚近其延津一
帶之柳園等口尤爲喫緊臣已飛飭署河北鎮
花里雅遜布督同遊擊穆隆阿帶領宣化鎮兵

五百名由長垣順隄迎赴延津渡口一帶扼要
巡防又派署總兵雙祿督同都司劉承冀帶領
正定鎮兵五百名由磁州入安陽一路徑赴黃
河北岸與花里雅遜布會合遇有偷渡賊匪卽
行堵剿其大名長垣一帶業經臣疊飭該鎮董
占元督同將備各員駐紮嚴防臣又飛催後起
官兵兼程前進以資合力堵剿迅殄賊氛奏入

上命軍機大臣傳諭訥爾經額曰前撲汴梁賊匪現由鄭州汜水一帶奔竄其河北之彰德懷慶衛輝等府及延津一帶之柳園等口最爲喫緊據該督奏稱已飭花里雅遜布等分路嚴防自應如此辦理著卽嚴飭帶兵各員分段扼要實力巡防遇有賊匪偷渡或大股竄來卽行迎頭攻剿不准一賊北渡儻逆匪因有黃河阻隔未能一時搶渡盤踞黃河南岸逼近滋

擾著卽飭令該總兵等帶兵於上下游繞渡南岸出其不意痛加剿洗直隸河南雖係兩省當此軍務緊急之際斷不可稍分畛域前曾降旨調盛京吉林馬步官兵馳赴天津聽調現在軍情是否必須駐守津門抑或應調撥他處著訥爾經額體察具奏

同日舒興阿奏言臣前因逆匪竄入豫境卽調陝甘滿漢官兵來陝防剿無如甘涼西肅各營

距陝過遠一時未能齊到惟有固原漢中道路
較近經臣疊次嚴催馳赴潼關一俟官兵到有
一二千名卽派大員管帶分起馳進臣俟後起
官兵續到卽統帶馳往合力進剿如山東直隸
情形緊要亦卽遵

旨北行斷不敢稍有耽延至陝甘總督關防應否帶往
軍營鈐用以昭信守伏候

訓示祗遵奏入

上命軍機大臣傳諭舒興阿曰現在匪黨紛紛逃逸奔
突靡定陝西與河南毗連地方情形十分喫緊著舒
興阿嚴催所調各兵迅速趨行無論何路兵丁先到
卽派得力將領管帶前進偵探賊蹤迎頭截擊或設
伏旁抄斷其歸路該督亦卽察看情形出關督勦近
來軍營惡習病在遲緩失機此股賊匪若不及早殲

除致令裹脅蔓延又蹈從前覆轍儻渡河北竄擾及
畿輔勦辦更難得力訥爾經額已遴委總兵大員帶
兵渡河舒興阿督兵出境不特爲山陝屏障卽河南
地方文武有可以就近調遣之處亦當統籌全局一
面奏聞一面相機辦理至請將總督關防帶往軍營
鈐用著照所請行

同日王履謙奏言 臣 疊據懷慶府知府余炳燾

等稟稱南岸汜水縣有東來賊匪數千人闖入
縣城焚掠幸南岸已無船隻驟難北渡嗣又探
得賊匪西往鞏縣一帶搶奪洛河船隻意圖由
洛入黃再行北渡兵單賊衆河岸遙長請卽調
兵堵禦等情臣查洛河在黃河之南係洛陽偃
師鞏縣三縣所轄之地本未設有渡口乃忽聞
由此搶船入黃意圖北竄自必有本地奸匪勾

結實出意料之外卽札調柳園等口防兵就近
迅往溫孟二口協力守禦因思省城兵勇不下
萬餘賊匪由西而來距省已遠溫孟二口情形
危急應卽咨商撫臣速派弁兵北渡往援至山
西直隸俱與河南北岸毗連亦卽飛咨於各要
口設兵防堵撫臣陸應穀未知移紮何處河臣
長臻至今未到刑部員外郎邵懿辰仍在山東

劉家口河北道蔣啟敷在省守禦北岸別無駐
守大員臣萬分焦灼惟有恪遵

諭旨分飭沿河地方文武嚴密巡防隨時截擊並飛催
就近官兵往援斷不敢以責止稽查稍涉鬆懈
奏入

上命軍機大臣傳諭王履謙長臻曰黃河南北兩岸最
關緊要屢次諭令該河督實力巡防何以至今尙在

濟甯殊屬不知緩急長臻身任河督防守河岸是其
專責儻任賊乘閒偷渡自問當得何罪陸應穀馳回
汴梁已令其帶兵出省勦賊正在喫緊之時王履謙
長臻察看情形緩急應如何就近調派卽行相機辦
理本日諭令訥爾經額派員帶兵趕赴黃河北岸扼
要堵剿卽著長臻督帶河標官兵探明賊蹤嚴密堵
截並隨時知照河南各路統兵大員迅速追剿及直

隸帶兵鎮將一體嚴防

欽定勦平粵匪方略卷四十四 癸丑年

六月初二日 乙亥 托明阿西凌阿善祿奏言 臣等

自追勦逆匪以來馬步同行追趕不及因將綏
遠城及陝甘馬隊歸併黑龍江馬隊由 臣托明
阿西凌阿督率追截 臣善祿督催步隊隨後接
應沿途擒斬賊匪八十餘名於二十四日馳抵
榮陽該逆已竄往汜水搶船立即督率馬隊跟

追於二十五日趕至汜水縣城東探得城內尙有逆賊五六百名臣托明阿西凌阿隨分三路進攻大股逆賊見兵追到直奔渡口意欲上船經我兵追殺緊急該逆忽又轉回並東西兩土山內賊匪一齊撲下施放槍礮抗拒連撲三次俱被我兵擊退共殺賊三百餘名並燒燬逆船十三隻生擒五十餘名內有黃巾黃褂及黃巾

紅袍賊目四名當時臣善祿督催步隊趕到從後會剿亦擒斬賊匪百餘名次日仍撥馬步各隊分路進剿該逆正在渡口上下排列船隻抗拒經我兵奮勇直前擡槍擡礮連環施放斃匪百餘名生擒數十名擊翻逆船三隻燒燬十數隻賊始分投亂竄間有乘船順流東下者亦有竄往北岸者餘盡奔赴汜水縣西北土山大溝

探得該處尙有賊營傍岸有大小船百餘隻山路崎嶇溝深道狹一時未能聚殲當飛咨河南山東撫臣於黃河兩岸扼要嚴防並統兵各大臣迅速就近渡黃相機迎剿遏其北竄

同日陸應穀奏言據探賊於二十一日由汜水縣小口先令數百人過河搶船全股渡河等情查汜水對岸係懷慶府屬溫縣西向則由河內

可竄山西澤州道路最近北至彰德東至衛輝
又與直隸山東接壤豫省官兵追趕不及臣當
飛函知會托明阿善祿等帶兵趕赴滎澤渡河
儘力追剿並令經文岱柏山探明賊匪如果全
數北渡亦卽跟追相應請

旨迅飭直隸山西山東督撫諸臣各派重兵嚴密堵剿
俾免竄越均奏入

上命軍機大臣傳諭托明阿西滾阿善祿曰賊匪被剿
紛竄間有乘船東下及竄往北岸者汜水縣西北河
岸復有大小船百餘隻一時難以殲除該逆蓄謀渡
黃恐該將軍等一時未能剿除淨盡已分諭恩華慧
成勝保等迅速赴援並據陸應穀奏稱先派經文岱
柏山帶兵無論黃河南北跟蹤追剿該撫亦卽日帶
兵出省督剿該將軍等務當不分南北併力攻圍將

賊匪悉數殲擒勿留遺孽

上又命軍機大臣傳諭陸應穀曰現在賊匪竄至汜水
意圖北渡經托明阿等殲獲甚多勢已挫衄果能合
力夾攻不難迅就撲滅該撫令經文岱柏山帶兵追
剿該撫亦卽日出省計各路官兵已不爲少卽當併
力追擒殲除淨盡勿令偷渡黃河以固北省藩籬爲
要

上又命軍機大臣傳諭訥爾經額曰逆匪自汴梁敗散後由滎陽竄往汜水膽敢搶船偷渡經托明阿西凌阿善祿等分兵追擊斬擒甚衆共燒燬擊沈逆船二十餘隻傍岸有船百餘隻尙未燒擊淨盡亟應嚴密堵剿以固畿疆著訥爾經額迅卽嚴飭帶兵各員於要隘處所確切偵探一遇北來之賊卽行迎頭截擊遏其竄路該督惟當懷遵疊奉諭旨隨時調度籌辦

萬勿稍涉大意

上又命軍機大臣傳諭恩華慧成勝保曰此股賊匪自
汴梁擊敗後由滎陽竄往汜水搶掠船隻雖經托明
阿等督率馬步官兵沿途截殺擊沈偷渡船隻連獲
勝仗然尙有乘船東竄之賊或北竄懷衛或順流直
下均未可定若任其奔竄則直隸山東山西陝西各
省皆有蔓延之患恩華由濟甯進兵慧成循黃河北

岸而行均與賊蹤相近著卽探明賊勢與托明阿陸
應穀等協力會剿勝保計日可抵汴城並著跟蹤追
躡何路緊急卽往何路攻剿無論河南河北恩華慧
成勝保等總須極力兜圍殲除淨盡聞此股賊匪多
半脅從並非大隊恩華等務當趁此兵力迅速前進
以固北地藩籬

上又命軍機大臣傳諭舒倫保舒興阿張祥河李德哈

芬曰逆賊自汴省敗走後竄入汜水傍岸並有船百餘隻賊衆奔突靡定一經踰河而北則山陝等省隨處皆形喫緊昨諭舒興阿出關督勦著卽嚴催所調官兵探明賊蹤迎頭截擊其陝豫交界要隘卽著舒倫保張祥河嚴密籌防至山東山西與河南毗連處所著李鴻哈芬嚴飭鎮將帶領得力兵勇分赴各要隘相機堵截勿令闖入該將軍督撫惟當不分畛域

合力兜擒以期一鼓殲除毋稍延緩

上又命軍機大臣傳諭王履謙長臻曰本日據托明阿等奏賊匪在汜水縣搶船渡河經我兵殲獲多名焚燒船隻該逆奔汜水縣西北土山大溝藏匿賊勢雖蹙然尙意圖偷渡長臻身任河督防河是其專責賊匪一渡北岸則隨處皆可肆擾著會同王履謙實力巡查儻有賊蹤該河督卽帶兵協同各路統兵大員

跟蹤追剿不可稍有疏虞至托明阿所奏乘船東下
及竄往北岸之賊諒亦無多著該河督速派弁兵搜
查撲滅勿令蔓延勾結

同日王履謙奏言二十八日據報賊由洛河搶
船北渡我兵槍礮齊施斃賊甚多實因隄岸綿
長寡不敵衆以致賊匪登岸二十六日溫縣失
守等情查溫縣距懷郡僅四十里直隸山西等

省俱各毗連除分咨各督撫扼要防堵外卽飛咨陸應穀長臻迅速帶兵往剿其疏防渡口之文武員弁應由撫臣河臣查明叅處至臣等督飭不嚴應請一併交部議處並請

旨飭調大兵攻剿奏入

上命軍機大臣傳諭恩華曰本日據托明阿等奏賊由汜水搶船偷渡已諭恩華等探明賊蹤攻剿頃復據

王履謙奏賊由洛河搶船渡過北岸溫縣已於二十
六日失守賊匪渡河直隸山陝隨處震動各路援兵
惟該尙書相距最近著卽不分兩夜飛速前進卽使
鍋帳未齊馬匹未到亦須一面飛催一面起程萬不
可片刻耽延此時賊匪初過黃河勢尙不大乘此撲
滅當易得手恩華身係宗室在內廷多年必能知朕
心之憤急勇往向前也

上又命軍機大臣傳諭訥爾經額哈芬曰本日據托明
阿陸應穀等先後具奏賊匪搶船偷渡當有旨令訥
爾經額哈芬派員迎剿頃據王履謙奏賊匪渡河五
月二十六日溫縣失守該縣距懷郡僅四十里直隸
山西俱與毗連著訥爾經額卽派得力將弁飭令星
馳前往迎頭截擊該督亦應相機進剿俾該逆大受
懲創並著哈芬派委大員酌帶兵勇馳往會剿

初三日

丙子

琦善陳金綬奏言

臣

等因連日大雨

積潦汪洋恐揚城賊匪乘雨潛襲督飭官兵嚴
加防範十九日賊果由廣儲門突出七八百人
又從北門城上縋下百餘人搭蓋浮橋先後渡
河俱向北面擁來幸我兵於西北樹林設伏一
經瞭見署參將李應魁等帶兵迎剿擊斃賊匪
三百餘名該逆敗走我兵一齊追至護城河邊

該逆搶過橋北二百餘人守橋之賊恐我兵乘勢過河將橋板抽撤城內之賊急將廣儲門堅閉其未入城者除撲河淹斃外餘經官兵悉數轟斃因城上槍礮齊施不能過河二十二日雨止後接續會攻並飭令仍於南門蔣王廟一帶嚴防臣等惟有竭盡血誠與在事諸臣設法迅圖克復以冀稍紓

九重南顧之憂再前奉

諭旨派令翰林院侍讀學士翁同書前來軍營茲該學士已於五月初七日行抵軍營奏入報

聞

初五日戊寅訥爾經額奏言據王履謙咨稱溫縣

於二十六日失守臣前令署河北鎮花里雅遜布帶宣化兵五百名赴延津渡一帶防堵查該

鎮係由大名取道長垣至黃河北岸恐一時未能趕到復飭大名鎮董占元帶兵一千名暨署參將烏爾清額帶兵三百名剋日起程馳赴溫縣迎剿卽令花里雅遜布在延津渡屯紮作董占元後路聲援至董占元帶兵出境該處防堵事宜尙有署藩司張集馨等帶兵二千二百名練勇千餘名堪資防範惟是直隸幅幘遼闊四

通八達不特匪竄懷慶直隸喫重即使西擾晉
省直隸亦多接壤處處宜防兵力以分而愈薄
現在理藩院尙書臣恩華自兗州帶兵起程由
蘭儀口渡河前往汴梁查汴圍已解自應卽由
河北順隄赴懷慶一帶迎勦較爲便捷臣已飛
咨恩華酌量辦理俟該尙書督兵到彼卽令董
占元帶兵折回以防東境至大名廣平一帶偏

近豫省必須重兵駐守擬請將前調駐天津之盛京步隊兵三千名吉林馬隊兵二千名改駐臨洺關仍留

盛京步隊兵二千名在津屯紮足資彈壓東省設有緩急並可作景州防兵後援

同日西凌阿托明阿善祿奏言據報汜水西北土山大溝逆匪並鞏縣折回賊匪三四千名均

歸入汜水縣城內臣等卽整隊出營繞至東南兩門督兵攻城該逆抵死守禦復分撥官兵四路圍攻賊見攻急欲由東門闖出逃竄經我兵連放槍礮斃賊多名該逆復退回城時綏遠城兵將北門攻開黑龍江馬隊隨入城內勦殺賊開西門竄逸經黑龍江等營官兵截殺五六百名臣等親督步隊亦由東西兩門繼進極力勦

洗共計殺賊二千餘名內有穿繡衣者四五十名生擒長髮賊五十餘名多係湖南湖北人訊明正法二十九日據報汜水縣西北黃河沿有賊船四隻土溝內尙有賊匪藏匿卽督隊出至河干擊斃賊百餘名餘匪梟水投往北岸賊營南岸別無船隻我兵馬步隊一時不能全渡未便輕進仍督隊由汜水一帶搜勦回營西北山

溝已無賊匪藏匿俟探明河北賊情趕緊籌剿
並飛咨直隸山東陝西山西各督撫撥兵扼要
防堵飛催各路援兵就近渡黃相機截剿均奏
入

上命軍機大臣傳諭訥爾經額曰逆匪數千盤踞汜水
縣城我兵於二十八九兩日連次攻剿克復縣城惟
北岸有賊營盤踞此股賊匪經托明阿等先後斬擒

不少其勢漸衰惟業已渡河懷衛一帶甚屬空虛現
在南岸別無船隻托明阿等所帶馬步隊恐一時不
能全渡若任令賊匪過河肆行裹脅擾及直隸境界
其勢又熾該督現派花里雅遜布馳往亦祇帶兵五
百名仍恐不敷攻剿著迅派得力鎮將統帶精兵前
赴河北與花里雅遜布併力迎剿正可會合托明阿
等前後夾擊該督務當不分畛域督飭鎮將越境剿

賊懷衛一帶肅清則直隸藩籬自固

上又命軍機大臣傳諭托明阿西凌阿善祿曰賊踞汜
水縣城經托明阿等痛加剿洗地方漸就肅清惟據
稱北岸尙有賊營盤踞南岸別無船隻我兵一時不
能全渡昨聞溫縣失守是河北之賊勢尙猖獗托明
阿西凌阿善祿此次接仗頗合機宜著卽乘此聲勢
迅從黃河上下游設法覓船渡過北岸與花里雅遜

布等併力圍攻務使餘匪速就蕩平毋令蔓延貽患
上又命軍機大臣傳諭勝保曰賊匪自汴梁擊敗後分
竄汜水經托明阿西凌阿善祿進剿疊勝擒斬甚多
餘匪已乘間搶船渡河北擾溫縣等處已諭托明阿
等渡河追擊惟兵力尙單且恐賊渡河後又多裹脅
勝保此時行抵何處著卽趕緊趨行探明賊蹤所在
徑行抄截此股賊匪現尙無多乘其奔竄未定尙可

一鼓殲除切勿拘執致誤事機

上又命軍機大臣傳諭陸應穀曰本日據托明阿等奏連日攻剿獲勝惟現在南岸別無船隻馬步隊一時不能全渡該將軍等正當追剿得手若因船隻不便阻隔南岸豈不有誤事機著陸應穀迅卽派員於黃河上下游調撥船隻以便大兵北渡該撫前派柏山經文岱帶兵剿賊所有黃河以南未淨餘匪卽責成

柏山經文岱等趕緊搜捕勿留餘孽一俟南岸肅清
仍飭令該總兵等渡河會擊現在懷衛一帶甚屬空
虛該撫現已出省著卽酌量緩急隨時策應

上又命軍機大臣傳諭舒興阿李德哈芬曰汜水地方
業已肅清惟北岸賊營虛實尙未探確已諭令托明
阿等設法渡河追剿並諭訥爾經額派兵出境迎擊
各省形勢均應扼守險要不宜盡分畛域若乘其奔

突未定一鼓勦除較易爲力豫省與山西陝西山東
水陸毗連要隘必須鄰省派兵赴豫據守北岸合力
協勦使賊無暇喘息方不致再有蔓延舒興阿現已
出省李德哈芬均派兵防堵著卽探明賊蹤或迎頭
勦擊或從旁追截不可因未入本境觀望遲延

上諭內閣曰逆匪由開封竄擾汜水經該將軍等督兵
追勦疊獲勝仗帶隊官員及滿漢兵丁無不勇往直

前覽奏實深欣慰托明阿追賊迅速連次接仗大挫
兇鋒洵屬調度有方著加恩賞戴花翎並賞給白玉
翎管一枝白玉四喜搬指一箇西凌阿係獲罪之員
此次擊賊尙屬奮勉若能趕緊追賊續獲全勝當與
善祿同邀恩賞至此次出力將弁兵丁著托明阿查
明據實酌保候朕施恩

同日陸應穀奏言賊匪由溫縣竄入懷慶欲奔

山西當卽催令經文岱迅速迎截並先經咨會
恩華等各帶官兵馳赴懷慶衛輝一帶堵剿旋
探河面另有賊股順流而下當飭沿河文武實
力防守而二十七八等日省城忽訛傳賊至人
心驚惶臣與司道督率文武員弁晝夜登陴巡
守未卽起程連日鎮靜彈壓方始安定現准托
明阿善祿等咨二十五日統兵進至汜水河沿

開仗獲勝

臣

卽飛催托明阿等迅速過河乘勝

追勦惟據鹿邑縣盤獲裹脅逃散難民孫三元

等供稱賊匪使人往江南送信令再分股北來

汴省爲北路門戶必須嚴防現在兵力單薄復

飛催前調永城防守之河北鎮兵一千名趕緊

來省駐紮以壯聲威此外並無可調之兵臣帶

兵勇四百餘名於二十九日出省趕至鄭州相

機前進

陸應穀又奏言署河北鎮經文岱函稱與柏山路並咨會柏山在鄭州同臣進剿乃至今未據又咨會經文岱先由滎澤過渡防衛輝懷慶一閒散之地當令折回鄭州嗣據探報賊已渡河防其北竄爲先且汝州距賊尙遠未免置兵於商酌欲往汝州一路防剿臣以賊在河南自以防其北竄爲先且汝州距賊尙遠未免置兵於

咨覆臣於初二日行抵鄭州經文岱柏山皆未
見到亦不知行抵何處臣惟有將所帶兵勇先
至滎澤一面飛催經文岱等迅速趕來以便會
同進剿奏入

上命軍機大臣傳諭陸應穀曰賊匪搶船渡河竄至北
岸陸應穀現在帶兵趕至鄭州進剿經文岱柏山欲
往汝州經該撫飛催折回均未據咨覆陸應穀身任

封疆鎮將皆歸節制似此疲玩不職之員何不卽行
叅奏著該撫傳旨經文岱柏山該鎮等避近就遠有
意遷延若再不遵調度折回稍遲定以軍法從事賊
匪竄入懷慶欲往山西現在懷慶府城如何守禦抑
係被賊竄踞所奏殊未明晰山西鄰境仍當隨時知
照一體嚴防毋稍疏虞

同日琦善奏言臣督攻揚城用礮連環轟擊將

城垣轟壞丈許連日城身攻塌漸多雙來因有
機可乘用木棍作爲浮橋過河支架雲梯首先
奮勇直上率同弁兵先後登城臣一面直至城
下督戰一面飛速知會提臣陳金綬等飭令各
路兵勇登城接應漕臣福濟亦派來鄉勇二百
名奮勇登城者十餘人福濟查文經亦親督兵
勇馳往東門攻打維時北面已經登城之兵槍

矛並進殺斃賊匪不可勝計兼用火箭將城內
房屋燒燬數處正在攻擊得勢乃近在西路之
兵俱不肯向前僅恃城上官兵與賊接仗該逆
在城樓施放槍礮拋擲火彈城上席篷城下板
屋齊燃我兵被火燄薰蒸致總兵雙來左頰被
槍子打入折落車齒二箇一時暈倒幸爲兵丁
扶下其餘弁兵傷亡甚多勢在危急臣當卽親

催陳金綬督飭官兵登城詎呼應不靈陳金綬
雖身先向前而衆兵尙復逡巡觀望城上官兵
因無接應勢不能支仍行退下此次登城殺賊
可冀克復旋因接應不力未能得手以致守備
楊發把總袁竣德藍翎額外溫魁額外王林陣
亡參將李志和等受傷統計陣亡受傷官兵甚
多陳金綬係幫辦軍務大員當此軍情喫緊調

遣無策咎實難辭相應據實叅奏可否摘去頂戴以觀後效出自

聖裁其隨陳金綬直隸帶兵各員俟臣查明分別叅奏

臣攻勦揚城日久無功應請將臣交部議處其陣亡受傷官兵由臣咨部分別辦理

琦善又奏言連日盤獲奸細隔別訊問內嚴豫一名所供尤詳據稱楊秀青派江甯賊匪八千

鎮江賊匪四十分股進攻六合報復前讐由來
安天長取道接應豫省股匪總欲先取汴梁再
定行止等情臣連據徐州上游探報攻汴賊匪
經官兵擊敗有退至朱仙鎮奔向陳許一帶之
信豫省勦捕甫經獲勝若再添此大股恐北路
賊勢復張查六合若經堵禦賊衆卽難分竄而
該處防兵僅止吉林馬隊一千五百名深恐衆

寡不敵臣所帶之兵及陳金綬之兵實無可撥
因查鄖陽鎮總兵瞿騰龍帶兵二千名現已行
抵瓜州先令由灣頭徑赴六合堵禦並協同吉
林官兵迎頭截擊使賊無由北竄浦口儀徵一
帶仍飭官兵一律嚴防至江甯北岸上游之和
州本無官兵防守而安徽撫臣李嘉端又由裕
溪口回至廬州誠恐賊衆乘虛徑由上游分股

竄赴六合腹背夾攻臣已飛咨李嘉端豫爲防範奏入

上命軍機大臣傳諭琦善曰賊踞揚州數月以來尙未克復現又有由六合分股北竄之信儻賊勢蔓延愈難剿辦該大臣現今令瞿騰龍在六合堵禦著卽飭該總兵迅赴六合防守毋令賊匪北竄其浦口儀徵等處亦應一律嚴防並隨時知照李嘉端豫爲防範至

此次攻城雖未得手該大臣等仍當督飭將士奮勉進攻迅圖克復毋得再蹈因循

卜諭內閣曰此次登城殺賊總兵雙來奮勇先登卒被槍傷實屬果敢出力惟因西路之兵接應遲緩以致揚城未能克復陳金綬身任提督幫辦軍務督率無方著摘去頂戴帶罪圖功琦善調度失宜著卽革職留任陣亡之守備楊發等俱著交部從優議卹陣亡

弁兵一併照例議卹

同日

上命軍機大臣傳諭琦善陳金綬雷以誠向榮許乃釗
曰聞金陵逆匪多欲乘間脫逃其真賊懼被殺害暗
作紅邊白圍馬褂希圖溷跡官兵間有薙髮者私出
探聽城內有瓦木匠人及園戶機匠各約五六千人
均欲俟大兵破城內應現在賊匪守城皆驅老弱之

民營中百姓居多逆匪不過十分之一金陵如此揚
州鎮江更可想見著琦善向榮等督飭將弁激勵兵
勇剋日進攻合力勦洗並曉諭各城中被脅之衆自
拔來歸妥爲安撫儻能設計殺賊爲官兵內應功成
之日必當優加賞敘至廬州府團練是否以紅邊白
團馬褂爲號著卽知照巡撫李嘉端等查明防範毋
任溷跡其滁州清流關地方扼要著咨會該撫嚴防

以杜偷越

初六日巳卯張芾奏言五月十八日有賊船千餘

隻乘北風大作直撲江西省城停泊陳孚恩等
所帶練勇逼近江邊無險可據且未經行陣能
守未必能戰既恐寡不敵衆又因城內兵單當
卽撤隊入城一同登陴固守查江西民情柔弱
自聞警報紛紛遷避在省紳士及工商匠役人

等無不遠颺幸一切軍需平時嚴備且自江忠源來省所帶楚勇皆係敢戰之士軍心稍振惟僅一千二百名七門各派一百名駐守其餘五百名作爲游兵策應賊船來時卽經臣張芾陳孚恩江忠源等督同楚勇與本省各營官兵在城上施放大礮擊沈匪船三隻該匪又用小船抄入南門外之南海經知府林福祥督率游兵

點礮擊沈賊船二隻並有手執黃旗登岸者均
經兵勇擊退是日共擊沈賊船五隻斃賊一百
餘名士氣頗揚賊鋒已挫臣等與江忠源商議
乘賊初到布置未定簡選輕銳潛師抄擊惟城
外民房稠密臨時拆毀不及祇得縱火焚燒但
非厚集兵力兩路夾攻戰守難操勝算應請

飭下向榮及張亮基等迅速發兵應援不特保全江西

實於東南全局大有關係奏入

上命軍機大臣傳諭張芾陳孚恩江忠源曰賊船沿江
上竄徑撲省城經該撫等督率兵勇擊沈賊船亟應
悉力固守以待援兵著卽會同陳孚恩督同江忠源
並在城文武各員分派兵勇激勵紳民認真防守毋
稍疏懈城外兵勇旣不能不撤回城中仍須時出奇
兵於城外江干截擊挫賊兇燄嚴防偷挖地道密拏

奸細毋令內外勾結聞吉南贛道周玉衡辦理防堵
素稱得力若令管帶兵勇乘此灘漲順流而下最爲
近便該撫此次所發摺報與前次所發僅後一日何
以遲至六七日始行遞到如果道路梗阻卽應知照
沿途設法繞越以速爲要廣東接濟兵餉現解在途
者共有十四萬餘兩亦著迎探接護萬不可使有疏
失

上又命軍機大臣傳諭向榮曰據張芾奏賊船已撲省城請於向榮軍營撥兵援救朕思該逆分股竄擾原圖牽掣江南大軍現在江西省城情形緊急若多分江南兵力又恐掣動大局墮賊奸計向榮軍營能否撥兵前往之處著酌量緩急辦理如果金陵及早克復何至賊黨紛竄滋蔓難圖向榮等前次遣散之說殊不足恃仍著速籌攻克金陵先將大股殲除則餘

黨亦聞風而潰至向榮糧臺本由江西支應現在該省道路必有梗阻應改移何處爲妥各處餉銀務須隨時知照沿途地方繞道妥護毋稍疏虞

上又命軍機大臣傳諭張亮基崇綸駱秉章曰據張芾奏賊船直撲江西省城固守待援等語湖廣爲江西最近省分著該署督撫等卽於湖北湖南兩省遴選得力鎮將帶兵迅速赴援俾得速解省圍萬不可稍

有耽延其湖北應防之處仍著該督撫各就現存之
兵移遠就近扼要駐紮以遏逆匪上竄之路

同日

上諭內閣曰前經疊降諭旨令各省督撫曉諭紳民實
行團練自衛鄉閭近聞河南奏報逆匪自竄汴梁屢
經各屬鄉民協助官兵沿途剿殺遂至窮蹙西奔可
見兵民同心賊衆卽無從肆擾現在大兵疊次獲勝

汜水一帶賊匪焚勦無餘難保其不亡命奔突希圖
四竄所有毗連河南之直隸山東山西陝西等省風
俗敦龐民情強固自能同心協力各保閭閻茲特再
行申諭各該督撫嚴飭所屬實力舉行團練一州一
縣之中地勢險夷民風柔勁身爲牧令必應纖悉皆
知平日果能好惡同民臨事自能禦災捍患各該紳
耆世守田里聞見較真其應如何設防之處定能各

就情形妥爲布置總期先事豫防有備無患官民相信則衆志可以成城軍興以來徵調頻仍供頓勞苦不免重累吾民朕念切民依難安寢饋封疆大吏皆有司牧之責其各體朕意徧行宣示毋再延玩將此通諭知之

初七日 庚辰 雷以誠奏言琦善連日攻城東路一

帶萬分喫緊勢難兼顧臣卽飭鹽知事銜張翊

國管帶壯勇馳赴五臺山地方以便臨時策應
是夜琦善大營極力攻城礮聲不絕正在添選
壯勇前進以爲後繼忽報琦善營中總兵雙來
與張翊國各帶兵勇登雲梯上城殺斃賊六七
百名其時各路兵勇尙未趕到而雙來張翊國
奮勇不顧業已殺入城內城內之賊拌死抗拒
槍礮齊施四面火起張翊國等身已受傷寡不

敵衆祇得奮力殺出非有以獎勵之不足策其
將來張翊國係殉難江甯縣知縣張行澍之姪
本屬忠義傳家茲復身先進城殺賊圖報雖全
城未復而以寡擊衆實爲行軍所難應否將總
兵雙來鹽知事銜張翊國先行量子鼓勵出自

天恩奏入

上諭內閣曰此次琦善督兵攻城總兵雙來與管帶壯

勇之鹽知事銜張翊國各帶兵勇登城殺賊以寡敵衆實屬奮勇可嘉雙來著賞加提督銜張翊國著給予五品頂戴並賞戴花翎以示優獎

同日

上諭內閣曰前因黃河渡口巡防緊要特降諭旨令該河督會同王履謙扼要設防長臻到任後早應親歷河干督同京員邵懿辰等暨廳營員弁實力稽查現

在河岸已有逆匪偷渡擾及溫縣該河督始以大汛將臨奏請赴豫督防實屬不知緩急長臻著交部議處該河督赴工防汛密邇河干巡查渡口事宜是其專責所有軍營兵馬及文報往來需用船隻並著該河督一併飭屬妥辦毋任延誤

初八日 辛巳 請爾經額奏言據署藩司張集馨報

稱參將烏爾清額帶領直隸弁兵駐紮豫省陳

橋渡口防堵五月二十八日見有賊船十數隻
揚帆北駛當卽會同河南知府戴鸞翔等列兵
岸口該逆不敢全行攏岸內有一船直撲河干
經我兵槍礮齊施逆匪不及抵禦奪獲賊船一
隻該逆受傷落河死者無數又直隸弁兵在河
岸拏獲賊目莫應揚陳亞秀並賊匪十三名其
餘賊船仍在河心游駛槍礮皆不能及惟有晝

夜嚴防不使登岸該藩司復添派宣化遊擊穆
隆阿帶兵運送銅礮四尊至陳橋渡口會同烏
爾清額協力防剿總兵董占元於初三日行抵
衛輝晤該府景昌知賊匪進溫縣城後經該處
紳民併力擊退竄至武陟縣復經武陟紳勇隨
同營員攻剿將賊匪偪至司馬集地方圍困該
鎮卽帶領遊擊玉祥都司舒敏督兵迎頭截剿

並探悉河南撫臣陸應穀總兵經文岱俱過河
北剿捕臣卽移紮磁州相機進剿現在懷衛彰
一帶各路帶兵大員俱已陸續趕到官兵雲集
合力攻圍自當一鼓殲除奏入

上命軍機大臣傳諭訥爾經額曰逆匪船隻經直隸將
弁兵丁會同知府戴鸞翔攻擊奪獲一隻其餘賊匪
自應趕緊用礮轟擊勿任竄赴下游其竄入溫縣之

賊經該處紳勇擊退該逆竄至武陟復經該處紳勇
隨同營員攻剿將賊匪圍困司馬集地方惟有迅速
攻擊不可稍緩尤不可稍分畛域致失事機該大臣
現已統領河南河北諸軍所有各路官兵統歸節制
更屬責無旁貸著卽會同恩華托明阿統籌全局相
機調度

上又命軍機大臣傳諭恩華托明阿曰據訥爾經額奏

探悉陸應穀經文岱俱過河北並稱賊匪進溫縣城
後經紳勇併力擊退竄至武陟縣復經紳勇隨同營
員攻勦將賊匪偏至司馬集地方圍困是此股賊匪
勢已窮蹙若合力兜勦不難一鼓殲除恩華著卽赴
懷衛一帶探明賊蹤所在與托明阿等併力夾擊將
此股逆匪剋期掃蕩以慰朕念

上諭內閣曰此次逆船徑撲北岸經官兵會擊先挫其

鋒該地方紳民復能協力勦賊與官兵聯爲一氣甚
屬可嘉現在陸應穀經文岱等俱帶兵過河追勦各
路帶兵大員俱已陸續趕到著訥爾經額卽督飭諸
軍併力攻勦並傳旨曉諭各屬紳民合志同仇迅殄
醜類

上又諭內閣曰現在大河南北官兵雲集不可無人統
領以一事權大學士直隸總督訥爾經額著頒給欽

差大臣關防所有河南河北各路官兵統歸節制理藩院尙書恩華江甯將軍托明阿均著幫辦軍務該大臣等其統籌全局乘此賊勢窮蹙督率諸軍合力攻勦毋稍延誤河南巡撫陸應穀係守土大員帶兵勦賊責無旁貸陝甘總督舒興阿山東巡撫李德山西巡撫哈芬均著仍遵前旨督兵會勦總期協力同心迅掃賊氛以慰朕望